




Fisi mlahi aliishi katika kijiji
cha Mkosi.




Katika kijiji jirani, aliishi
Kobe mwoga. Fisi na Kobe
walikuwa marafiki.



Fisi alisikia kwamba kulikuwa na nyuki waliotengeneza asali tamu kuliko yote. Nyuki hao walisafiri mbali na mizinga yao mara moja kwa mwaka. "Lazima tuipate ile asali nyuki watakapokuwa safarini," Fisi alimwambia Kobe.




Ingawa Kobe aliogopa kwenda, hakuwa na ujasiri wa kukataa. Asubuhi iliyofuata, Fisi na Kobe walianza safari yao. Fisi alienda kwa kasi huku Kobe akijikokota nyuma kwa woga.




Walipanda milima
wakashuka kisha wakavuka
mabonde. Waliuvuka mto
mkubwa wakaendelea na
safari yao wakiwa na nia ya
kuifikia ile mizinga ya nyuki.




Hatimaye, waliona mizinga ya nyuki milimani kwenye miti. Fisi alikwenda kwa haraka. Kobe alikuwa tayari kuzirai kutokana na njaa na uchovu.




Fisi alipoufikia mzinga mkubwa zaidi, alimwambia Kobe, "Haraka! Panda juu ya mti uuangushe mzinga chini."



Kobe aling'ang'ana kuupanda mti. Alipofanya hivyo, aliangalia chini mara kwa mara asije akaanguka. Fisi alikasirishwa na kitendo hicho akaanza kumpigia Kobe kelele.




Kobe alipougusa mzinga,
alisikia sauti ya nyuki.
Kumbe walikuwa bado
ndani ya mzinga wao! Kobe
alishtuka akaanguka chini.



Mzinga wa nyuki ulimwangukia Kobe akafunikwana kufichwa na asali! Fisi alianza kuilamba ile asali. Lakini nyuki hawakufurahia kitendo hicho.




Nyuki walimuuma Fisi kila sehemu ya mwili akaamua kukimbilia usalama wake. Hata hivyo, nyuki walimfuata wakaendelea kumuuma.




Fisi aliteremka kutoka mlimani, akavuka mto na bonde. Nyuki waliendelea kumuuma wakati huo wote.



Kobe naye alikuwa bado chini ya mzinga mkubwa. Hatimaye, kila kitu kilikuwa kimya. Kobe aligundua kwamba mzinga na asali vilikuwa vimekaukia mgongoni kwake.



Kobe alitambua kuwa hakuhitaji tena kujificha kichakani. Gamba jipya alilopata lingeweza kumkinga na hatari yoyote.



Fisi alikuwa amechoka na alijaa vidonda mwilini. Alizirai kabla kufika nyumbani. Alipoamka, aligundua kwamba mishale ya nyuki ilisababisha yeye kuwa na madoadoa kwenye ngozi yake.

Hivi ndivyo kobe alivyopata gamba lake ngumu
naye fisi akapata madoadoa kwenye ngozi yake.
Urafiki kati ya fisi na kobe uliisha.